

# TERCERA CARTA DEL APOSTOL SAN JUAN

---

## Gayo turâte que eriqui Dios je ra

<sup>1</sup>Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. <sup>2</sup>Sechesequa, acheẽ mbeite quia Dios je nderiĩ co. Dios nemingo turã sacua. Nderete abe mingo turã sacua no. Sã ereico siqui tuchite Dios rese no. <sup>3</sup>Seya tuchi que jirandu mose nderese ra. Nanderesenda mo ngue ngaẽ sembiirandu nderese ra. —Gayo riqui tuchi Dios rese aque, i que sembiirandu ra. <sup>4</sup>—Nderiirĩ nyi tuchi Dios rese pee, i mose seje, sembia beite equia co. Ũquĩ nguiatu sembia tuchi nguiã mbae mo si co.

<sup>5</sup>Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. <sup>6</sup>Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que euaẽ ñee ure je ra. Mbae turã emondo mondo bei ee, embucuata turã sacua. Eĩ mose ra Dios ia tuchi nderese. <sup>7</sup>Jesús riĩ nguiatu ũquĩ ndiqui nguiã ngata mbia mbaaquiatsu quiatu. Mbae mo nda eisi chooño eã Jesús icuasa reã mo si. <sup>8</sup>Nyebe nande chõ mbae nandemee mee ee. Dios cheẽ nenei neneisate quia ũquĩ nde.

## Diótfrefes ucuasu raã ñooño

<sup>9</sup>Papel jua que ambesa rei mondo jeñumunua ji je ra. Diótfrefes quiatu seosei chiãte nguiã. —Se mii ño ererecuarã, ite. <sup>10</sup>Huee seso mose ra Diótfrefes icuaã asenei jẽ ja je. Ae icuaã esaã ure je nae, ũquĩ. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. <sup>11</sup>Sechesequa, ereicochĩ nda eicuã mo ndui. Eturã ndui chõ eico. Eturã nduinda quiarei Dios resenda. Ae siqui quia eicuã ndui, ũquĩ ndei Dios resenda eã.

## Eturã tuchi, i Demetrio je

<sup>12</sup>Demetrio quiarei eturã tuchi. Co eriqui tuchi Dios rese co. Mbia ja abe ñee turâte quia eriĩ ũquĩ. Se abe acheẽ turâte quia eriĩ co. Acheẽ ñooño ãte que se quia jẽje resẽ.

**Juan embesa hui bei**

<sup>13</sup>Mbae tasenei ja tuchi ndeje, ae rei que se ra. Ambesa oco sereãte mondo ndeje. <sup>14</sup>Namo jiri ra amae nderese reae. Aque mose ra nandechẽ tuchi nandechue. <sup>15</sup>Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.